

四庫全書

史部

欽定四庫全書

史部

大金集禮

目錄
卷二

詳校官監察御史_臣劉芬

編修_臣程嘉謨覆勘

覆校官中書_臣汪學金

校對官中書_臣王鍾泰

謄錄監生_臣閻豐

欽定四庫全書

史部十三

大金集禮目錄

政書類二 儀制之屬

卷一

帝號上

太祖皇帝即位儀

太宗皇帝即位儀

皇統元年冊禮

天德貞元冊禮

卷二

帝號下

大定七年冊禮

大定十一年冊禮

卷三

追加謚號上

天會三年奉上太祖謚號

天會十三年奉上太宗謚號

天會十三年奉上景宣皇帝謚號

天會十四年奉上祖宗謚號

皇統五年增上太祖宗謚

皇統五年增上祖宗尊謚

卷四

追加謚號下

大定三年增上睿宗尊謚

大定十九年奉上孝成皇帝謚號

雜錄

天德二年興聖宮上謚儀與統五同兼封遼王事節故并入雜錄

卷五

皇太后皇后

天會十三年尊奉兩宮太皇太后

天德二年尊奉永壽永寧宮

皇統元年冊皇后

天德二年冊徒單氏

雜錄

卷六

追諡后

聖穆光懿皇后

欽獻皇后

欽仁皇后

惠昭皇后

永寧宮

欽慈 貞懿皇后

宣獻皇后

昭德皇后

悼平皇后

闕

卷七

妃

冊太皇太妃

追封

雜錄

卷八

皇太子

皇統二年誥授儀

天德四年冊命儀

大定八年冊命儀

大定二十七年冊皇太孫

守國儀

雜錄

卷九

親王公主

親王

宗室

公主

郡縣主

卷十

皇帝夏至日祭方丘

后土同

齋戒

陳設

省牲器

鑾駕出宮

奠玉帛

進熟

祭五岳 四鎮 四海 四瀆

鑾駕還宮

卷十一

皇帝祭皇地祇於方丘

每年夏至日祭

齋戒

陳設

省牲器

奠玉帛

進熟

望瘞

卷十二

至

卷十七

原有
闕文

卷十八

時享上

攝行禮

卷十九

時享下

攝行禮

卷二十

原廟上

奉安

卷二十一

原廟下

朝拜

卷二十二

別廟

孝成舊廟

卷二十三

御名

聖節

卷二十四

赦詔

御樓宣赦

隨朝拜赦詔

外路迎拜赦詔

隨朝拜歷日詔

外路迎拜歷日詔

卷二十五

宣命

宣麻

賜勅命

送宣賜生日

卷二十六

原闕

卷二十七

儀仗上

行仗

立仗

原闕

卷二十八

儀仗下

皇后鹵簿

皇太子鹵簿

雜錄

卷二十九

輿服上

輅輦

冠服

皇后車服

皇太子車服

卷三十

輿服下

寶

印

臣庶車服

卷三十一

班位表奏

班序

命婦

牋表

奏事

卷三十二

輟朝廢務

輟朝

廢務

休假

卷三十三

闕原

卷三十四

岳鎮海瀆

祀儀

雜錄

卷三十五

長白山

封冊禮

雜錄

卷三十六

宣聖廟

祀儀

雜錄

卷三十七

雜祠廟

宮觀

保陵公

應聖公

嘉廕侯

河神

卷三十八

汭祀雜錄

卷三十九

朝會上

元日稱賀儀

聖節稱賀儀

曲宴儀

人使辭見儀

卷四十

朝會下

朔望常朝儀

雜錄

臣等謹案大金集禮四十卷原本無編輯年

月姓氏考金世宗時嘗命官叅校唐宋故典沿革彙次上之至章宗明昌初書成凡四百餘卷名曰金纂修禡錄今其書不傳此書則又在明昌之前惟見于金史張行簡傳而纂輯之詳弗著以其時核之當是大定末年所編次也自尊號冊諡以及祠祀朝會燕饗諸儀節燦然悉備金史諸志全本于此而賴是書補闕者尚多若祭方丘儀是書有前祭二

日太尉告廟之儀而金史則未之載又金史
云設饌幕于內壩東門之外道北南向考之
此書則陳設饌幕乃有東門西門二處蓋壇
上及神州東方南方之饌陳于東門外西方
北方之饌陳于西門外金史獨載設于東門
外者于禮為舛未若此本之完善也惟第十
卷載夏日祭方丘儀而園丘郊天儀獨闕考
金自天德以後並祀南北郊大定明昌其制

漸備編書者既載北郊儀注不應反遺南郊
當為脫佚無疑又卷十二至卷十七原本多
闕因併為一卷書之而卷二十六三十三全
文俱佚無可校補今姑仍之云乾隆四十二
年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

目錄

欽定四庫全書

大金集禮卷一

帝號上

太祖皇帝即位儀

太宗皇帝即位儀

皇統元年冊禮

天德貞元冊禮

太祖皇帝即位儀

收國元年春正月壬申朔諸路官民耆老畢會議創新
儀奉上即皇帝位阿里罕宗翰乃陳耕具九祝以闡

土養民之意復以良馬九隊隊九匹別為色并介冑弓矢矛劍奉上上命國號大金建元收國二年十二月庚申朔皇弟安班貝勒率百官宗族奏言自遼主失道奉天伐罪數摧大敵克定諸路功德之隆亘古未有敢上尊號為大聖皇帝上讓者再羣臣固請從之

太宗皇帝即位儀

天會元年九月六日皇弟安班貝勒即皇帝位先是宗幹率諸弟暨百官及太祖陵隧之未掩詣上前請即

位上不許謂有先帝諸子是日不克襄事翌日猶不許
宗幹曰社稷至重付安班貝勒以大位者先皇帝之
治命也群臣不敢有貳遂與諸弟暨百官奉赭袍以被
上體而真璽於懷乃即位於隧前己未告祀天地丙寅
大赦改元

皇統元年冊禮

天會十三年正月二十五日受遺詔即位頒詔天下皇
統元年正月二日太師宗幹率百寮上表曰唐虞無能

名其強名者聖作之迹天地有大美欲歸美者物生之
常歷觀振古大有為之君必行當世不可曠之典布在
方策炯如日星自非稱謂之安烏足形容其德伏惟皇
帝陛下繩其祖武簡在帝心躬勤儉以親九牧之風禁
游惰以勸三農之作外則安集勞來稍節於菟畋內則
恬澹沖虛弗親於聲色六年於此一德惟新適洽奕世
之成平具舉前王之濶略鋪張文物藻飾聲名勅五典
以示五惇正五行而為五用代上古結繩之治造聖人

合契之書蘊此沈幾固有電雷之威斷發於宸翰豈特
雲漢之昭回兼長馳射之通材併作帝王之能事臂使
西夏肘加東韓北羌輸產土之良南越致祈天之請云

云一視同仁懷小民如赤子九功惟叙慶多稼於曾孫
瑞物充庭頌聲載路若乃嚴恭率典寅畏求端道四時
於玉燭之和齊七政於璇璣之運謂親有德饗有道每
躬祀之儀而應以實不以文曲盡靈承之意所謂崇
天也玄功不宰神化自然卷而藏之則鼓萬物以不言

擴而充之則彌六合於無外仰公成理好其要不好其
詳司契無為同於道亦同於德所謂體道也而又弗忘
兢業益戒盈成有咨詢宿德之勞謙有體貌大臣之殊
敬觀書乙夜而緝熙靡懈於初終決事齋居雖近習莫
知其喜怒此敬事之欽也包五事以作哲蹈三知之入
微挾姦稔數者逆折於將形抱義服忠者亟用如不及
見日月照臨之博所照何窮雖鬼神情狀之幽其情安
遁茲辨物之明也銳於修完以正百度而有典謨訓誥

可舉之文隨所指顧克靖四方是謂聰明睿知不殺之
武幽深遠近其聖也無所不通篤實輝光其德也有容
乃大是以并包禹迹增廣文聲周極皞皞之生民同濟
熙熙之壽域聳於聞見孰不揄揚乘乾元首作之初薦
天子無窮之問臣等不勝大願謹奉上尊號曰崇天體
道欽明文武聖德皇帝詔不允凡三表懇請詔曰博考
藝文敷求古訓謂其尊虛名而徇衆欲不若修實德以
承天心故屢却於奏章將確守於朕志而叩閭愈衆陳

義益堅推讓再三敦迫備至念天自民而聽拒違恐拂
於樂推而名者實之賓佩受終期於求稱勉依來請惕
懼增深所請宜久七日遣上京留守奭告天地社稷析
津尹宗强告太廟十日帝服袞冕御元和殿宗幹率百
僚恭奉冊禮冊文曰皇統肇開犧燧因功而紀號帝圖
傳序勲華象德以著稱率皆應億姓之樂推所以對三
靈之眷顧自時厥後何莫由斯國家千載應期奕世修
德重光積慶應歷統天恭惟皇帝陛下恭承垂裕之休

保有無疆之祚表在躬之瑞旋九宮而乾數周當出震
之初闢群氛而義馭朗煥八彩重瞳之質宅九州四海
之尊方其恭嘿不言淵沈自保固已照羣臣之邪正洞
庶政之後先既而雷動風飛乾旋坤闔威柄一而姦朋
懷懼仁言播而遠近歸心至於博採庭謨奮張王旅必
待有名而後應固非得已而亟行是以戈鋌所臨金湯
失險攻堅易於振槁傳令速於置郵仍以暇時舉修墜
典斟酌律禮糠粃漢唐損益質文規模虞夏隆功並建

振古罕倫然猶體貌耆英惇叙宗族約已而厚祿秩之
賜虛心以來啓沃之言府庫不積而均力於農疇聲色
不適而留神於古訓服御靡崇於彫飾宮室聊給於會
朝田獵習武事而已亦踰月而不行宴樂給賓享而已
蓋非時而不召歷觀前代皆有強鄰各專社稷版圖互
稱命令制誥今則日月所燭正朔無殊並開有指之土
疆盡仰至尊之名號加之璇璣正協玉燭時和連珠合
璧之祥居卿日告千倉萬箱之積比屋歲滋謠頌浹於

康衢珎貢來於絕域乃者別京幸望鑒輅省方屬燕薊
之多風積陰霾而浹日及茲動軫寂不揚塵天地清明
人神慶悅是以群工卿尹四海耄倪並造明庭交修封
奏敢叙陳於懿美願深抑於謙沖謂寅畏時恭聰明時
憲崇天之寶也虛靜恬淡慈儉為寶體道之驗也視聽
言動復於禮緝熙光明典於學茲謂欽以直己是非可
否究其實幽深遠近得其情茲謂明以察微經緯有方
煥乎丕顯之文威懷兼示赫爾布昭之武固天縱之將

聖而多能非學惟民歸於一德而主善為師咸五登三
豈形容之可及挂一漏萬慚鋪叙之非工臣等不勝大
願謹奉玉冊玉寶上尊號曰崇天體道欽明文武聖德
皇帝立仗一千一百八十人改服通天冠宴二品以上
官及高夏使其行事官奏定上公以太師宗幹太尉以
正員費摩烏塔司徒以平章昂攝中書令二員正員韓
企先外以待制昺攝侍中三員以平章奕左丞昺左宣
徽劉箬攝右丞蕭仲恭攝門下侍郎參正李德固攝中

書侍郎尼楚赫等四員攝中書舍人趙端甫等二員攝給事中捧冊八員捧寶四員以耶律紹文蕭彥謙等充以胡景山攝刑部尚書以左右點檢攝扶持官并奉香合進茶酒盞三員接祖宗神御前茶酒盞三員其禮部尚書太常卿吏禮部侍郎並以正員

已後視此奏差除正官外並出宣九日放朝習恭謝并御棲儀十日大禮十一日高麗正旦人使辭十二日恭謝祖廟還御宣和門大赦改元

天德貞元冊禮

天德二年二月百官上表奉上法天曆運曆文宣武大明聖孝之號三月望日行冊禮初七日呈稟訖上冊寶合用行事官正員外差攝上壽酒上公一員奉冊太尉讀冊中書令一舉冊中書舍人二押冊吏部侍郎一捧冊官四奉寶司徒讀寶侍中一舉寶給事中二押寶禮部侍郎一捧寶官四奏告官二行禮侍中二太常卿二九日呈稟訖行禮節次受冊前三日合遣使奏告天地

昊天於南郊地祇於北郊

宗廟並以香幣酒脯醯前二日諸司停奏刑罰文書兵部帥其屬設黃麾仗

殿門內二千六百人門外四百人

宣徽院帥儀鑾司設座於殿中間設冊寶幄次於大明殿門外設羣官次於大明門外大樂令與協律郎設宮懸於殿庭其日奉冊寶訖設登歌於殿上立舞表於殿下符寶郎其日俟文武官入奉八寶升置殿上上冊寶

訖復揖還所司其日質明奉冊太尉奉寶司徒

貞元儀奉冊太師奉寶太尉

讀冊中書令讀寶侍中以次應行事官並集於尚書省

奉迎冊寶由元德正門入至大明門外

貞元儀通天正門入至大安門外

置冊寶於幄次中

冊北寶南

應行事官分立於左右文武群

臣等並入次朝服攝太常卿與大樂令帥工人入就位

協律郎各就舉麾位捧冊官捧寶官揖冊官揖寶官由

西偏門入至西階下冊寶褥位之西東向立俟

貞元儀無捧冊捧寶官等入至褥位立俟之文

等探閣門報通事舍人引攝侍中版奏中嚴訖典儀贊
者各就位閣門官引文武百寮分左右入於階下塲道
東西相向立符寶郎奉八寶由西偏門分入升置殿上
東西間相向訖分左右立於寶後通事舍人引攝侍中
版奏外辦扇合服袞冕以出曲直華蓋侍衛警蹕如常
跪俛伏興舉麾工鼓柷奏乾寧之樂出自東房即座儀

使副添香

殿下第一墀香爐宣徽院另差閣門一員添香

貞元儀殿下沙墀

爐煙升扇開簾捲協律郎偃麾啟樂止

凡樂皆協律郎麾舉工樂祝而後作偃麾戛敵而後
止下皆准此

太常博士通事舍人自冊寶幄次分引冊太常卿前導
吏部侍郎押冊而行奉冊太尉讀冊中書令舉冊官

貞元儀進冊舉冊官

於冊後以次從之次太常博士通事舍人二員分引寶
禮部侍郎押寶而行奉寶司徒讀寶侍中舉寶官

貞元儀進寶舉寶官

於寶後以次從之由正門入宮懸奏歸美揚功之曲太
常卿於冊床前道至第一墀

貞元儀並
云沙墀

香案南藉冊寶

褥位上少置

冊北
寶南

太常卿與舉冊官退於冊寶少西東

向立應博士舍人立於其後揖冊寶冊床弩手繖子官

等又於其後皆東向太尉司徒中書令侍中皆於冊後面北以次立吏部侍郎禮部侍郎立於其後立定

貞元儀冊北寶南太常卿於冊東北向側立太師以下於冊寶褥位東序立捍冊床弩手繖子退立東階下面北立太尉以下於冊寶褥位西序立捍寶床弩手繖子退立於西階下立定

樂止閣門舍人分引東西兩班羣官合班轉北向立東班以西為上西班以東為上

中間小留班路俟立定太常博士通事舍人四員分引太尉司徒中書令侍中吏部禮部侍郎以次各復本班訖博士舍人退以俟初引時樂奏歸美揚功之曲至位立定樂止典儀曰拜贊者承傳太尉以下應在官位群官皆舞蹈五拜班首出班起居訖又贊再拜如朝會常儀太常博士通事舍人四員再引太尉司徒中書令侍中吏禮部侍郎復進至冊寶所稍南立定擗冊寶床努手繖子官並進前舉冊寶床與太常博士通事舍人二

員分引冊太常卿前導吏部侍郎押冊而行奉冊太尉
讀冊中書令舉冊官於冊後以次從之冊初行樂奏肅
寧之曲次通事舍人太常博士又二員分引寶禮部侍
郎押寶而行奉寶司徒讀寶侍中舉寶官於寶後以次
從之詣西階下至冊寶褥位

貞元儀冊寶床與博士舍人分引太師太尉以下導
從冊寶行樂奏肅寧之曲至西階下冊寶褥位

少置

冊北
寶南

樂止

貞元儀樂止太尉以下於冊寶西序立

擗冊寶床弩手繖子官等退於後稍西東向立捧冊官

與擗冊官並進前

去冊函蓋置於床

取冊匣升太常博士通事

舍人分引冊太常卿側身導冊先升奉冊太尉讀冊中書令舉冊官捧冊官於後冊以次從升

吏部侍郎不升止於冊床之西

冊初行樂奏肅寧之曲進至殿上博士舍人分左右於前楹立以俟

舍人在東以俟冊引讀中書舍人自東階還本班博士在西以俟引奉冊太尉降自西階下面東立

讀冊中書令於欄子外前楹稍西立以俟舉冊官捧冊官立於其後奉冊太尉從外至褥位奉冊太尉搢笏少前跪置訖執笏俛伏興樂止太尉退於前楹稍西立以俟太常博士立於後太常卿少退東向立舁冊官立於其後皆東向捧冊官先入舉冊官次入讀冊中書令又次入捧冊官四員皆搢笏雙跪捧

兩員於冊北一員稍東一員稍西兩員於冊南一員
稍東一員稍西

舉冊官二員亦揖笏兩邊單跪對舉中書令執笏進跪
稱中書令臣某讀冊讀訖俛伏興中書令俟冊昇先退
通事舍人引降自東階復本班訖

通事舍人依前復引太尉

太常卿

降復寶床前昇冊官並進與捧冊官等取冊匣興置於
殿東間褥位案上西向捧舉冊官等降自東階還本班
昇冊官亦退太常博士引奉冊太尉降自西階東向立

以俟次捧寶官與昇寶官俟讀冊中書令讀訖出並進
前去寶函蓋置於床取寶蓋升太常博士通事舍人分引寶太
常卿側身導寶先升奉寶司徒讀寶侍中舉寶官捧寶
官於寶後以次從升

禮部侍郎不升立於寶床之西

寶初行樂奏肅寧之曲進至殿上博士舍人俱退不升
並於前楹稍西立以俟

博士以俟引司徒降西階以太尉立舍人以俟引侍

中降西階復本班

讀寶侍中於欄子外前楹間稍西立以俟舉寶官捧寶官立於其後奉寶司徒寶升至褥位奉寶司徒揖笏少前跪置訖執笏俛伏興樂止司徒退於前楹西立以俟太常卿少退東向立昇寶官立於其後皆東向捧寶官先入舉寶官次入讀寶侍中又次入捧寶官四員皆揖笏雙跪捧

兩員於寶北一員稍東一員稍西兩員於寶南一員

稍東一員稍西

舉寶官二員亦搢笏西邊單跪對舉侍中執笏進跪稱
侍中臣某讀寶訖俛伏興侍中俟寶興先退通事舍人

引降自西階復本班訖

通事舍人依前復引司徒

昇寶官進前與捧

寶舉寶官等取寶盞興置於殿之西間褥位案上東向
捧寶舉寶官等與太常卿俱降自西階及吏部侍郎皆
伏本班揖寶官亦退太常博士引捧寶司徒次奉寶太
尉東向立定博士舍人贊引太尉司徒進詣第一墀香

案南禡位立定博士舍人贊退典儀曰拜贊者承傳在位官皆再拜訖博士舍人二員引太尉詣東階升

貞元儀捧冊官與昇冊官並進前取冊先升奉冊太師通事舍人分引冊太常卿側身導冊先升奉冊太師讀冊中書令押冊進冊舉冊官捧冊官於冊後以次從升冊初行樂奏肅寧之曲進至殿上奉冊太師於禡位揖笏少前跪置訖執笏退樂止太師與讀冊中書令於欄子外前楹稍東面北立博士舍人少退面西側立押

冊進冊舉冊捧冊揖冊官又在其後太常卿少退於前
楹稍西東向立定捧冊官先入舉冊官次入讀冊中書
令又次入捧冊官四員皆揖笏雙跪捧兩員於冊北一
員稍東一員稍西兩員於冊南一員稍東一員稍西舉
冊官二員亦揖笏兩邊單跪對舉中書令執笏進拜跪
讀冊讀訖俛伏興立於前楹東太師之次舉冊捧冊官
少退立太常卿降復寶床前押冊昇冊官並進前與捧
冊舉冊官等取冊興置於殿之東間褥位案上西向押

冊進冊捧舉昇冊官等俱降自東階還本班博士舍人引
奉冊太師中書令降自東階還本班次捧寶官與昇寶官
俟讀冊中書令讀訖出並進前取寶盥升太常博士通事
舍人分引寶太常卿側身導寶先升奉寶太尉讀寶侍中
押寶進寶舉寶捧寶官於寶後以次從升寶初行樂奏肅
寧之曲進至殿上奉寶太尉於褥位搢笏少前跪置訖執
笏退樂止太尉與讀寶侍中於欄子外前楹西面北立博
士舍人少退面西側立押寶進寶舉寶捧寶揖寶官又在

其後太常卿少退於前楹稍西東向立定捧寶官先入舉寶官次入讀寶侍中又次入捧寶官四員皆搢笏跪捧兩員於寶北一員稍東一員稍西兩員於寶南一員稍東一員稍西舉寶官二員亦搢笏兩邊單跪對舉侍中執笏進拜跪讀寶讀訖俛伏興退立於前楹西太尉之次舉寶捧寶官少退立押寶揖寶官進前與捧寶舉寶官等取寶盃興置於殿之西間褥位案上東向押寶進寶捧寶舉寶昇寶官等俱降自西階班博士舍人引太尉侍中降西階復

本班太常卿亦從太尉侍中降西階還本班立定太常
博士通事舍人引太師升殿宮懸奏純誠享上之曲至
階止

博士舍人退
不升以俟

閣使二員引太尉進至前立定樂止

閣使揖贊太尉拜跪賀殿下閣門揖百寮躬身太尉稱
文武百寮具官臣等言致賀詞

云云

貞元儀止云太師致賀詞

俛伏興

百寮
平立

退至階下博士舍人分引太尉降至東階

初降宮懸作肅寧之曲復香案南褥位立定樂止

貞元儀太師降自東階宮懸作肅寧之曲至位樂止

博士舍人少退典儀曰拜贊者承傳太尉司徒及在位群官俱再拜舞蹈三稱萬歲又再拜訖通事舍人引攝侍中升自東階進詣前楹間躬承旨退臨階西向稱有制典儀曰拜贊者承傳太尉司徒及在位群官俱再拜躬身宣詞云云宣訖通事舍人引侍中還位典儀曰拜贊者承傳階上下應在位群官俱再拜舞蹈三稱萬歲又再拜訖博士舍人分引太尉司徒就百寮位初引宮懸作肅寧之曲至位立定樂止

貞元儀無分引太尉司徒就位一節及無初引宮懸
肅寧之曲

閣門舍人分引應北面位群官各分班東西向立定通事舍
人引攝侍中升自東階當前楹間跪奏禮畢俛伏興引降
還位扇合簾降協律郎俛伏興舉麾工鼓柷奏乾寧之曲降
座入自東房還後閣進膳侍衛警蹕如儀扇開樂止捧冊官
帥捍冊床人捧寶官帥捍寶床人皆升殿取匣盞蓋訖置
於床前引進司官前導通事舍人贊引詣東上閣門上進

貞元儀進冊官跪進冊狀進寶官進寶狀以授內常侍各再拜以次出

通事舍人分引文武百僚等以次出歸幕次賜食以俟上壽上冊寶禮畢有司排辦御床及座宴羣官位並如曲宴儀攝太常卿與大樂令帥工人入并協律郎各就舉麾位俟等探舍人報通事舍人引三師以下文武百僚親王宗室等分左右入至殿階下稍南東西相向立通事舍人先引攝侍中版奏中嚴少頃又奏外辦扇合鳴

鞭協律郎跪俛伏興工鼓祝宮懸奏乾寧之曲服通天冠絳紗袍即座簾捲內侍寶扇開殿上下鳴鞭戛鼓樂止儀使副等添香爐烟升通事舍人引班首已下合班樂奏肅寧之曲至北向位重行立定中間少留班路通事舍人引攝侍中詣東階外至殿上少立閤門舍人引禮部尚書出班前北向俛伏跪奏稱禮部尚書臣某言請允群臣上壽俛伏興躬身通事舍人引攝侍中詣前楹間躬承旨退臨階稍東西向曰制可侍中少退舍人

贊禮部尚書再拜訖贊祇候復本班

貞元儀無禮部尚書跪奏侍中承旨一節

內侍局進御床入次良醞令於殿下橫階南酌酒訖典儀曰拜贊者承傳在位官皆再拜隨拜三稱萬歲訖平立太常博士通事舍人分引攝上公由東階升初升宮懸奏肅寧之曲殿上舍人少退二閣使揖上公進至進酒褥位樂止宣徽使以爵授上公上公搯笏受爵詣榻前跪進受爵訖上公執槃退至進酒位以槃授宣徽使

訖二閣使揖上公入欄子內贊拜跪殿下閣門揖百寮
皆躬身上公奏稱文武百寮上公具官臣某等稽首言
貞元儀無文武百寮具官之文

云云臣等不勝大慶謹上千萬歲壽俛伏興

百寮
平立

二閣

使揖上公出太常博士通事舍人引上公降自東階復
本班太常博士通事舍人退上公初降階樂奏肅寧之
曲至位立定樂止典儀曰拜贊者承傳上公與在位官
皆再拜訖百寮皆躬身通事舍人揖攝侍中進詣前楹

間躬承旨退臨階西向稱有制典儀曰拜贊者承傳上公及在位群官皆再拜隨拜三稱萬歲訖躬身宣曰得公等壽酒與公等內外同慶閣門舍人贊宣諭訖上公與百寮皆舞蹈五拜訖閣門舍人引百寮分班東西序面殿立博士舍人再引上公自東階升宮懸奏肅寧之曲至進酒褥位樂止上公搢笏宣徽使授上公槃上公詣欄子內褥位跪舉酒宮懸奏景命萬年之曲飲訖樂止上公進受虛爵訖復褥位以爵授宣徽使訖二閣使

揖上公退內侍局揖御床出

貞元儀無此昇出再進入一節

博士舍人並進前分引降自東階宮懸作肅寧之曲閣
門舍人分引東西兩班隨上公俱復北向位立定樂止
典儀曰拜贊者承傳在位官皆再拜三稱萬歲訖平立
殿上通事舍人揖攝侍中進詣前楹間躬承旨退臨階
西向閣門官先揖百寮躬身侍中稱有制典儀曰拜贊
者承傳在位官皆再拜訖躬身宣曰延王公等升殿典

儀曰拜贊者承傳在位官皆再拜訖搢笏舞蹈又再拜
訖太常博士通事舍人引上公以下合赴宴羣官分左
右升殿不與宴羣臣分左右捲班出宮懸奏肅寧之曲
百寮至殿上坐後立樂止內侍局進御床入依尋常宴
會再進第一爵酒登歌奏聖德昭明之曲飲訖樂止羣官
就坐傳宣賜起立拜執事者行羣官酒宮懸作肅寧之
數節次並如常儀曲文舞入觴行一周樂止尚食局進食執事者設羣官
食宮懸奏保大定功之舞

貞元儀奏萬國來同之舞

三成止出又進第二爵酒登歌奏天贊堯齡之曲

貞元儀天錫萬齡之曲

飲訖樂止執事者行羣官酒宮懸作肅寧之曲武舞入
觴行一周樂止尚食局進食執事者設羣官食宮懸奏
萬國來同之舞

貞元儀奏保大定功之舞

三成止出又進第三爵酒登歌奏慶雲之曲飲訖樂止

執事者行羣官酒宮懸作肅寧之曲觴行一周樂止尚
食局進食執事者設羣官食宮懸奏肅寧之曲食畢樂
止閤門官分揖侍宴羣官起立於席後通事舍人引攝
侍中詣榻前俛伏興跪奏侍中臣某言禮畢俛伏興閤
門舍人分引羣官俱降東西階內侍局舁御床出宮懸
作肅寧之曲至北向位立定樂止典儀曰拜贊者承傳
在位官皆再拜訖搢笏舞蹈又再拜訖再分班東西序
立

貞元儀東西序立侍中詣榻前跪奏禮畢

扇合簾降殿上下鳴鞭協律郎俛伏跪舉麾興工鼓祝
奏乾寧之曲降座入自東房還後閣侍儀如來儀內侍

贊扇開戛鼓樂止通事舍人引攝侍中版奏解嚴所司

承旨放仗在位羣官皆再拜以次出

天德二年十二月
省去十二字稱號

貞元三年十一月太師思忠等上表奉上奉天崇運

至孝大明淵謀睿斷聖文神武之號蒙從上省去十

二字餘從所請

二十七日稟訖四年正月七日行禮儀仗用三千人

提點

儀仗許霖畢禮部下太常寺於已行禮數內增損參詳到下

項儀冊用玉簡然總數七十五枚亦從文之多寡各長

一尺二寸闊一寸二分厚五分聯以金縷首尾結帶前

後四板刻龍鏤金若捧護之狀藉以錦褥覆以紅羅泥

金夾帕冊匣長廣取容玉冊塗以朱漆金裝隱起突龍

鳳金鑲

開

匣上又以紅羅繡盤龍鳳金帊覆之承以

鍍金裝長于床鍍金龍首鍍金魚鈎藉匣以錦緣褥又

組紅絲為條以縈匣

係天德二年檢照到典禮已經成造製度

實用玉廣四

寸九分厚一寸二分篆文填以金盤龍組係以暈錦大

綬赤小綬連玉環又玉檢高七寸廣二寸四分皆飾以

金裏以紅錦加紅羅泥金夾帊納于小盝盝以金裝內

設金床暈錦褥飾以雜色玻璃碧鈿石珊瑚金精石馬

瑙又盝二重皆裝以金覆以紅羅繡帕承以鍍金裝長

於床鍍金魚鈎藉盝以錦褥又冊寶行馬並飾以鍍金

冊寶案並塗以朱漆覆以紅羅銷金衣

實上篆文隱起其地填以金冊

檢並真書錄訖內填以金

前三日遣使奏告昊天上帝皇地祇並於

常武殿拜天臺設褥位牌

昊天上帝當中皇地祇次西少却

及香茶酒

祝版

祝版少府監成造學士院撰詞書寫進署訖付宣徽院差控鶴官用床擡昇覆以黃羅帕隨告官詣

祠所

告官就所居清齋一日告日質明宣徽院帥儀鑾司

鋪設供具閣門舍人一員引告官詣神位前再拜每位

上香跪奠茶奠酒再拜太祝讀祝版告官再拜退原廟

奏告准上前二日停奏刑罰文字正月四日六日習儀

於大安殿奉冊及上壽酒并致詞太師奉寶太尉讀冊

中書令讀寶侍中進冊中書侍郎進寶門下侍郎押冊

吏部侍郎押寶禮部侍郎各一舉冊中書舍人舉寶給

事中各二捧冊官捧寶官各四行禮侍中二一奏中嚴外辨及解

一宣制太常卿二一押樂昇冊寶官依例省令史充大樂令協

律郎二一殿上典儀贊者各二一閤門太常博士三二冊寶

奉冊寶引太師太尉通事舍人七二冊寶二引侍中一

還班一引太師進酒書門下史充昇冊案十四昇寶案六部令內常侍四人冊分引

宣徽院差弩手繖子百人擡冊寶床及案前一日尚

書省安設及次日行禮并隨內常侍入進兵部帥其屬設儀仗於殿門內外宣徽院帥儀鑾司於前一日設御座於殿中間設東西房前楹施簾設香爐香案於殿下沙墀設藉冊寶褥位於香案南設香爐二於殿榻之左右設冊寶幄次於殿門外稍東西向冊北寶南設藉冊寶褥位一於榻前設太師賀褥位於欄子北設藉冊匣寶盃案褥位各一於殿上東西間設藉冊床寶床褥位各一於殿西階下道西設羣官次於殿門外東上閣門外設

置冊寶褥位各一設中書門下侍郎拜褥各一所司約
量陳繖扇於三墀之左右宣徽院勒所司排辦御床菓
饌并差簾外執扇五十人開合如儀

依例供奉
官充展紫

大樂令

協律郎前二日設宮懸於殿庭又設協律郎舉麾位二
一于殿上樂懸西北一於殿下樂懸西北並東向閣門
司設百官位於殿庭如朝會儀又設贊者位於班前東
北又設典儀位於殿階上又設行事官位牌如已定儀
才候上冊寶訖還御幄又設坐宴羣官位於殿上如尋

常曲宴儀太常寺其日帥舁冊寶案官先入置案於殿
之東西間藉冊寶褥位上

冊東寶西

學士院定撰上冊寶訖

賀詞并上壽詞宣答制詞及大樂曲名并曲及登歌詞
與奏告祝文書寫進署中書侍郎進冊狀門下侍郎進
寶狀其狀尚書省禮房寫良醞令備酒并殿下酹酒如
常儀尚食排菓饌尚衣進冕服通天冠絳紗袍有司備
警蹕繖扇曲直華蓋等儀物符寶郎其日俟文武羣官
入奉八寶置於殿上東西間相向

舁八寶用控鶴門仗官

四員分

立寶後上冊寶訖復還所司御史臺告報外官刺史已上新除未辭或已辭未發及諸道使人并外官朝奏在都者各依本官職序班少府監造位牌三十面各長尺二闊一尺厚八分黑油引進司禮畢中書侍郎門下侍郎置冊寶匣盪於床內常侍四人與引進司官前導通事舍人贊引詣東上閣門上進上冊寶并上壽並如天德儀冊禮後恭謝原廟用天德儀惟不降詔

欽定四庫全書

卷一

大金集禮卷一

欽定四庫全書

大金集禮卷二

帝號下

大定七年冊禮

大定十一年冊禮

大定七年冊禮

大定元年十月 日上即位東京大赦改元十一月十六日有司奉表備禮上尊號聖明仁孝皇帝

初羣臣上十有二字上止受四字

大定二年七月禮官討定將來奉安裕享後羣臣當詣東上閤門奉表請增上尊號三年十月七日升祔睿宗裕享禮畢羣臣累奉表陳請未奉俞音五年正月平章政事宗憲率百寮奉表懇請曰雖有大能謙聖人之至德而歸美以報羣下之誠心仰希從欲之仁薦致瀆尊之請恭惟紹開景命克享靈心謳歌所歸厯數斯在思其艱圖其易勤於邦儉於家廟祐其嚴每厚蒸嘗之薦陵園是奉時為省謁之行楚子請盟貢復包茅之入尉

佗奉職使因白壁而通文軌大同干戈不用且哀矜庶
獄掄擇羣材分問俗之使以通下情行均賦之令以寬
民力蝗螟不害與沴氣以潛消黍稷維馨占甫田之屢
稔巍巍然高百王之治迹亶亶乎嚮三代之休風如典
冊有所未崇在臣子豈遑寧處夫膺帝命而履寶位是
為應天因民心而啓洪基是為興祚遠人來附綏之而
已乃修德以尚文得不謂仁文乎王略既宣服之而已
不窮兵而黷武得不謂義武乎本之以事無不通之聖

擴之以遠無不燭之明能廣前人之有聲實曰天子之
至孝合茲衆美允矣公言臣等不勝大願謹固請加上
尊號曰應天興祚仁文義武聖明至孝皇帝上猶固讓
三月宗憲等復抗表請曰函章屢貢宸聽未回雖聖心
能以自倣在臣下有所未安夫簡在上帝之心謂之應
天紹復先王之業謂之興祚仁以守位德以撫民無所
不通非聖孰能與此先之以愛夫孝何以加乎道備至
明名非虛美臣等不勝大願謹固加上尊號曰應天興

祚仁德聖孝至明皇帝詔答曰自臨御以來尚多闕政
而羣工兆姓為過情之禮以徽號見加章至六上益拒
益堅無乃激於忠愛而志在歸美不能自己歟且以國
體之重有不可闕者耶載念固執予守則恐鬱輿望披
襟全善則又難自安其去至明二字餘用勉從二十三
日下詔朕以正隆之失御獲承太祖之貽謀涉道未弘
臨政猶淺不意羣工之歸美遽以鴻名而見加奏牘屢
陳忠懇難奪朕雖俞允顏實忸怩今已勉受應天興祚

仁德聖孝之號尚念邊鄙甫寧民居始奠事無欲速時
貴適宜蓋王者必世而後仁禮至太平而大備故須待
熙洽之際乃可盡對揚之休所有禮冊當俟他年舉行
六年十一月二十三日羣臣復奉表陳請曰頃奉制書
誕揚徽號未崇冊典實鬱輿情今已四方無虞百工
允治節令調而五穀稔盜賊息而兆民安咸謂太平適
當斯旦伏願俯從忠悃昭受丕儀詔從之七年正月八
日遣皇子判大興尹許王告天地判宗英王文告太廟

十一日皇帝服袞冕御大安殿右丞相紇石烈良弼等
恭奉冊禮冊文曰形而上者謂之道道之用出於自然
物之祖者本乎天天之功歸於不宰然而尊居四大茂
育羣生觀妙有而曰希夷擬形容而稱穹昊惟聖運化
體道與天強為之名益功德所立者卓對揚其美繫臣
庶不謀而同雖繇謙讓以未遑其如樂推而不厭建久
安成長治況屬今休騰茂實蜚英聲茲為壯觀恭惟云
云剛健中正緝熙光明惟簡在於帝心實矜從於民欲

顯膺推戴非以力求大獲纂承其惟自度修德之符歟
見應誠之瑞畢臻六氣和而五穀登羣生遂而萬民殖
斯可謂之應天自頃禍亂實開聖明拯生靈于阡危安
基祚于隍杌宗祏有主人謀與能仗大順而揮天戈征
不庭而定皇國北陲孽寇授首於勢窮南服遠人尋盟
於事迫拓統無外迓衡弗迷大烈耿光丕靈承於祖孝
璇圖寶曆永孚休於邦家斯可謂之興祚兼愛無私博
施濟衆下恤刑之詔靡冤不申定寢兵之功惟暴是禁

續功臣之世而延其賞去貪人之類而表其廉非至仁孰能與於此為政則如北辰恭己而正南面昧爽丕顯輝光日新宜民宜人克君克長終始惟一茲尚監於湯銘威懷所加肆昭升於禹迹非至德孰能與於此道濟天下識居物先極深研幾通志成務斯可謂之聖宗祫合享祇事惟寅陵寢蠲蒸追懷罔極嗣有令緒能昭先功睦親族而和萬邦通神明而光四海斯可謂之孝未膺顯冊終鬱輿情固拒誠難俞音始下臣等管窺蠡測

雖莫際於高深玉振金聲敢奉揚於典禮臣等不勝大
願謹奉玉冊玉寶上尊號曰應天興祚仁德聖孝皇帝
有司援前代舊儀大朝會設黃麾仗五千二百五人皇
統年用一千一百八十人天德貞元並用三千人

二千六百人門內四百人門外

舊儀大朝會陳五輅於庭

玉在中金在東象次之革在西木次之

皇統行冊禮曾經陳設奏奉勅旨許用三千人車輅不

須陳設

六年十二月九日

奉冊太尉奉寶司徒讀冊中書令兼

進冊中書侍郎讀寶侍中兼進寶門下侍郎以宰執攝
舉冊中書舍人舉寶給事中各二員捧冊捧寶官各四
員二品三品官攝充押冊吏部侍郎押寶禮部侍郎用
正員以左宣徽同知攝行禮侍中以禮部尚書翰林直
學士攝太常卿

十二月二十五日宣

外撰冊匣十八員寶盃六員

撰冊案十二員寶案四員並用省部令譯史人等及用
大樂令一員協律太博各二員典儀贊者各一員通事

舍人五員命直學士張景仁撰冊文禮部侍郎劉仲淵

書篆冊寶

十一月二十七日勅

并差劉仲淵等監看成造冊寶吏

部侍郎土璫等提點編排儀仗冊寶用天德貞元制度

曲直華蓋依皇統貞元例止用一柄傘子二人并依貞

元例用明金黃羅方扇五十柄及壇臺上鋪褥用素黃

羅仁壽山妨礙行禮開立正門洞子并拆那綵結茶酒

樓子等奏定行禮節次

與天德儀同亦有更異并有皇太子禮故復備錄

受冊前三日合遣使奏告天地宗廟

大定十一年儀兼奏告社稷前二日諸司停奏刑罰文
字前二日百官習儀於大安殿庭兵部帥其屬設黃麾
儀於大安殿門之內外宣徽院帥儀鑾司於前一日設
受冊寶壇臺於大安殿中間又設御榻於壇上又設冊
寶幄次於大安殿門外及設皇太子幕次於殿東廊又
設羣官次於大安門外大樂令與協律郎前一日設宮
懸於殿庭又設登歌樂架於殿上立舞表於殿下符寶

郎其日俟文武羣官入奉八寶置於御座左右俟上冊
寶訖復掣寶還所司上冊寶儀正月十一日其日質明奉冊
太尉奉寶司徒讀冊中書令讀寶侍中以次應行事官
並集於尚書省俟冊寶興乘馬奉迎

令人從依導駕人數服飾

冊寶至應天門下馬由正門步導入至大安殿門外置

冊寶於幄次

冊北寶南

掣冊寶床弩手人等分立於左右文

武羣官並朝服入次攝太常卿與大樂令帥工人入就

位協律郎各就舉麾位擗冊寶案官由西偏門先入置
案於殿東西間褥位置訖各退於西階冊寶床褥位後
捧冊官捧寶官擗冊匣官擗寶盞官由西偏門先入至
殿西階下冊寶褥位之西東向立俟等探閣門報通事
舍人引攝侍中版奏中嚴訖典儀贊者各就位通事舍
人引文武百寮分左右入於殿陛下墀道之東西相向
立符寶郎奉八寶由東西偏門分入升殿置於御座之
左右東西相向訖分左右立於寶後

元擗八寶人下殿退立於殿東西階下稍南

通事舍人引攝侍中版奏外辦內侍承旨索扇扇合皇帝服袞冕以出曲直華蓋侍衛警蹕如常儀殿上鳴鞭

訖殿下亦鳴

已下鳴鞭皆准此

初索扇協律郎跪俛伏興舉麾

工鼓祝宮懸奏泰寧之曲侍臣進鎮圭

進受鎮圭侍臣係尚食局官

皇帝執圭出自東房即御座南向

釋圭即侍臣承奉立侍於左

儀鑾使副添香

殿下第一墀香爐宣徽院另差閤門一員添香

爐香升扇開簾捲協律郎偃麾戛敔樂止

凡樂皆協律郎舉麾工鼓柷而後作偃麾戛敔而後
止下皆准此

太常博士通事舍人二員自冊寶幄次分引冊太常卿
前導吏部侍郎押冊而行奉冊太尉讀冊中書令舉冊
官於冊後以次從之次太常博士通事舍人二員分引

寶禮部侍郎押寶而行奉寶司徒讀寶侍中舉寶官於
寶後以次從之由正門入宮懸奏天保報上之曲太常
卿於冊床前導至第一墀香案南藉冊寶褥位上少置
冊南北太常卿與舉冊寶官退於冊寶稍西東向立以俟
應博士舍人立於其後揖冊寶床弩手等又於其後皆
東向太尉司徒中書令侍中皆於冊寶後面北以次立
吏禮部侍郎次立於其後立定樂止通事舍人分引
東班以西為上西班以東為上

中間少留班路俟立定太常博士通事舍人四員分引太尉司徒中書令侍中吏禮部侍郎太常卿舉冊寶官等以次各復本班訖博士舍人退以俟初引時宮懸奏歸美揚功之曲至位立定樂止典儀曰拜贊者承傳太尉以下應在位羣官皆舞蹈五拜班首出班起居訖又贊再拜如朝會常儀太常博士通事舍人四員再引太尉司徒以次官復進至冊寶所依位立定揖冊寶床弩手等並進前舉冊寶床興太常博士通事舍人二員分

引冊太常卿前導吏部侍郎押冊而行奉冊太尉讀冊
中書令舉冊官於冊後以次從之冊初行宮懸奏和寧
之曲次通事舍人太常博士又二員分引寶禮部侍郎
押寶而行奉寶司徒讀寶侍中舉寶官於寶後以次從
之詣殿西階下至冊寶褥位少置冊北太尉以下以次
東向立樂止揖冊寶弩手等退於後稍西東向立捧冊
官與揖冊匣官並前進去冊匣蓋置於床取冊匣升太常博士
通事舍人分引冊匣太常卿導冊先升奉冊太尉讀冊

中書令舉冊官捧冊官於冊後以次從之

吏部侍郎不升立於冊床之西

冊初行宮懸奏和寧之曲進至殿上博士舍人並於前
楹稍東立以俟讀冊中書令於前楹稍西立俟舉冊官
捧冊官立於其後奉冊太尉從冊升進至御座前褥位
奉冊太尉搢笏少前跪置訖執笏俛伏興樂止太尉退
於前楹稍東立以俟博士舍人立於後太常卿少退東
向立揖冊匣官立於其後皆東向

兩員於冊北一員稍東一員稍西兩員於冊南一員
稍東一員稍西

舉冊官二員亦搢笏兩邊單跪對舉中書令執笏進跪
稱中書令臣某讀冊讀訖俛伏興中書令俟舉冊官興
先退博士舍人引太尉中書令降自東階復本班太常
卿降自西階復寶床前揖冊匣官並進前與捧冊舉冊
官等取冊匣興置於殿之東間褥位案上西向捧舉冊
官等俱降自東階還本班揖冊官等亦退入百官班捧

寶官與掣寶盃官俟讀冊中書令讀訖出並進前

去寶盃盃

置於床

取寶盃升太常博士通事舍人分引寶盃太常卿

導前先升奉寶司徒讀寶侍中舉寶官捧寶官於寶後
以次從升

禮部侍郎不升立於寶床之西

寶初行宮懸奏和寧之曲進至殿上博士舍人並於前
楹稍西立以俟讀寶侍中亦於前楹間稍西立俟舉寶
官捧寶官立於其後奉寶司徒從寶升進至御座前褥

位奉寶司徒搢笏稍前跪置訖執笏俛伏興樂止司徒退於前楹稍西立以俟太常卿少退東向立擗寶盥官立於其後皆東向捧寶官先入舉寶官次入讀寶侍中又次入捧寶官四員皆搢笏雙跪捧

兩員於寶北一員稍東一員稍西兩員於寶南一員稍東一員稍西

舉寶官二員亦搢笏兩邊單跪對舉侍中執笏進跪稱侍中臣某讀寶訖俛伏興侍中俟舉寶官興先退博士

舍人引司徒侍中降自西階復本班揖寶盞官進前與
捧寶舉寶官等取寶盞興置於殿之西間褥位案上東
向捧舉寶官等與太常卿俱降自西階及吏禮部侍郎
皆復本班揖寶官等亦退入百官班典儀曰拜贊者承
傳在位官皆再拜皇太子於殿東廊幕次改服遠游冠
朱明衣執桓圭先於大安殿後陪侍皇帝升殿於殿上
御榻東稍南面西褥位侍立俟太尉司徒上冊寶訖中
書令侍中讀冊寶訖俟殿下官皆再拜閣門使揖皇太

子出殿典贊儀分引降自東階宮懸奏和寧之曲至褥位立定樂止典儀曰拜贊者承傳皇太子並在位羣臣皆再拜訖典贊儀引皇太子升殿東階宮懸奏同心戴聖之曲至階上二閣使引皇太子詣御座前褥位立定樂止二閣使贊拜跪賀殿下通事舍人揖百寮躬身皇太子賀

誕膺徽號光御珍圖典儀告成寰區均慶

賀訖俛伏興二閣使引退至前楹階下典贊儀引降自

東階宮懸奏和寧之曲至位樂止典儀曰拜贊者承傳
皇太子及在位羣官皆再拜舞蹈又再拜訖躬身侍中
於御座前承旨退臨階西向立稱有制典儀曰拜贊者
承傳皇太子及在位羣官皆再拜訖躬身侍中宣答
勉從衆欲昭受鴻名禮文既成與卿等內外同慶

宣答訖典儀曰拜贊者承傳皇太子并階上下在位羣
官皆再拜舞蹈再拜訖典贊儀引皇太子詣橫階北東
面褥位立通事舍人分引應北面羣官各分班東西相

向立定通事舍人引攝侍中進當前楹間跪奏稱侍中
臣某言禮畢俛伏興內侍承旨索扇扇合殿上簾降協
律郎俛伏興舉麾工鼓祝宮懸奏泰寧之曲皇帝降座
入自西房還後閣進膳侍衛警蹕如儀扇開樂止中書
侍郎帥擗冊床弩手繖子人門下侍郎帥擗寶床弩手
繖子人皆升殿取匣盞蓋訖置於床引進司官前導通
事舍人贊引詣東上閣門具狀上進典贊儀引皇太子
歸幕次通事舍人分引文武百官以次出亦歸幕次賜

食以侍上壽千萬歲壽俛伏興二閣使揖皇太子出殿
至褥位典儀曰拜贊者承傳皇太子及在位羣官皆再
拜訖躬身通事舍人揖攝侍中進詣前楹間躬承旨退
臨階西向稱有制典儀曰拜贊者承傳皇太子及在位
羣官皆再拜訖躬身宣曰得卿等壽酒與卿等內外同
慶宣諭訖典儀曰拜贊者承傳皇太子及在位羣官皆
再拜舞蹈又再拜訖通事舍人引分班東西序面殿上
皇太子搢圭宣徽使授皇太子盤皇太子受盤訖皇太

子升殿宮懸奏萬壽無疆之曲皇帝舉酒時殿上下并侍立羣官皆再拜飲訖皇太子進至御榻前受虛盞訖樂止復褥位以虛盞并盤授宣徽使訖二閣使揖皇太子執圭退侍儀司揖御茶床出典贊儀進前引皇太子降自東階宮懸奏和寧之曲東西班羣官俱復北向立皇太子復位立定樂止典儀曰拜贊者承傳皇太子及在位羣官皆再拜訖躬身殿上通事舍人揖攝侍中進詣前楹間躬承旨退臨階西向稱有制典儀曰拜贊者

承傳皇太子及在位羣官皆再拜訖躬身宣曰延皇太子王公等升殿通事舍人揖攝侍中退典儀曰拜贊者承傳皇太子及在位羣官皆再拜舞蹈又再拜訖典贊儀及閤門通事舍人分引皇太子及王公以下合赴宴羣官分左右升殿

與宴官員數宣徽院取旨

不與宴羣官卷班出宮懸奏和寧之曲皇太子及百寮至殿上位後立樂止侍儀司進御茶床入依尋常宴會

再進皇帝第一盞酒

進酒官係宣徽院長貳官

登歌奏王道明昌之曲飲訖樂止

羣官就坐傳宣賜酒起坐拜數節次並如常宴會儀
執事者行羣官酒宮懸奏和寧之曲文舞入觴行一周
樂止尚食局進食執事者設羣官食宮懸奏功成治定
之曲舞三成止出又進皇帝第二盞酒登歌奏天子萬
年之曲飲訖樂止執事者行羣官酒宮懸奏和寧之曲

武舞入觴行一周樂止尚食局進食執事者設羣官食
宮懸奏四海會同之曲舞三成止出又進皇帝第三盞
酒登歌奏嘉和之曲飲訖樂止執事者行羣官酒宮懸
奏和寧之曲觴行一周樂止尚食局進食執事者設羣
官食宮懸奏和寧之曲食畢樂止侍宴羣官起立於席
後再拜訖通事舍人引攝侍中詣御榻前俛伏跪奏稱
侍中臣某言禮畢俛伏興通事舍人分引羣官俱降東
西階

皇太子依朝會宴例便不降謝

侍儀司揖御茶床出宮懸奏和寧之曲至北向位立定
樂止典儀曰拜贊者承傳在位官皆再拜訖舞蹈又再
拜訖通事舍人引分班東西序立內侍承旨索扇扇合
簾降鳴鞭協律郎俛伏跪舉麾興工鼓祝宮懸奏泰寧
之曲皇帝降座入自西房還後閣侍衛如常儀內侍贊
扇開夏啟樂止通事舍人引攝侍中版奏解嚴所司承
旨放仗羣官以次出

六年十二月十七日勅旨詳定謝太廟之禮二十一日
有司奏請今因天下推戴昭受大冊若備禮恭謝太廟
寅奉先之孝正合禮儀從之於七年正月二日行禮十
四日御應天門制曰朕以菲德獲承至尊賴祖宗燕翼
之謀啓國家興復之運以至邊鄙撤警民人奠居永思
積累於成平何敢康寧於夙夜鴻名顯冊實所未遑懇
請交章誠難固拒乃涓穀旦昭受上儀既揚對天之休
宜厚錫民之福可大赦天下內外大小職官並與覃恩

大定十一年冊禮

大定十一年八月詔以十一月十七日有事於南郊十月五日太尉李石率百僚奉表請曰帝王之典莫大乎承天臣子之心不忘於歸美蓋至德答乾坤之貺宜貴名增日月之光伏惟云云 丕釐耿命廣闢皇圖寅畏嚴恭簡帝心而上應高明光大繩祖武以勃興守位曰仁為政以德聖心通物之微隱孝治廣民之儀型迄用康年惟時懋敬憲唐虞之稽古監殷夏以從周由用天休

肇稱郊祀祖廟社稷罔不肅祇羣神山川於茲望秩斷
自緝熙之學敷為經緯之章至若江淮來同海隅肆靖
西旅之陪臣跋扈詔始問而即誅朔幽之羣醜逋逃兵
一臨而得雋暴禁亂止衆和民安四方無虞諸福畢至
功德若茲民臣何報惟有對揚於鉅典庶幾推謝於鴻
恩臣等以為禮無不敬之謂欽經緯天地之謂文所覆
者大之謂廣保大定功之謂武臣等不勝至願謹加上
尊號曰應天興祚欽文廣武仁德聖孝皇帝詔旨不允

十一月二十一日辛卯李石復奉表請曰天因人而聽
順人則天亦弗違名者實之賓有實則名其可已茲者
羣情之歸美以其偉蹟之無前抑而未從悚然失措夫
正心而誠意修己以安人至於出入起居罔不嚴恭寅
畏謹四時而致孝享敬五事而承天心此欽之實也仁
義立廉恥張禮樂明法度著建中和而為皇極求儒雅
而闡大猷以來遠人以洽四國此文之實也富有之謂
大業德容以受丕基恢然如乾道之包函博哉如坤元

之持載無此疆與爾界皆一視而同仁此廣之實也授
神略以折遐衝稽長道而屈羣醜陟威懷之禹迹小綏
定之唐功七德頌乎止戈一戎昭乎除亂此武之實也
實既如此名宜謂何伏望聖慈從人之願上猶固讓凡
三表懇請且謂南郊迎至以報天惟國家之熙事聖人
備道以全美屬臣子之揚休從古以然故實具在伏望
少忘沖挹俯賜矜從高拱穆清丕受典冊答神祇之靈
貺協臣庶之歡心詔從之十一月十九日遣皇子判大

興尹越王告天地判宗壽王爽告宗廟樞副耶律成告
社稷二十二日皇帝服袞冕御大安殿李石等率百僚
恭奉冊禮冊文曰聖人大德必得其名天下懽心以奉
其上恭千歲所接之統是二者相須而成若稽詩書之
格言具載帝王之能事巍巍之治發見於都兪赫赫之
功形容於雅頌其有賡歌帝作對揚王休匪今則然其
來尚矣恭惟祥發上帝統承武元申命用休從民所欲
當正隆之失馭聖緒幾危自華表以飛龍皇綱載整方

是時也遼餘孽寇肆逆滔天江左新君寒盟爭地爰赫
斯怒以修我戎俾克渠授首於勢窮遐裔革心於理曲
蓋天之所助者順而邦其永孚於休然後體乾元以長
人法辰極之居所仁不遠異德惟日新聖而無所不通
孝則昭哉嗣服固已鋪閱休揚偉蹟建顯號施尊名夫
惟克實之有光未究殊尤之絕迹若夫兢兢業業思政
之恒穆穆皇皇臨朝之肅禮法自國貴始威儀作民恭
先于其禴祀烝嘗必以齋莊中正憲唐虞之稽古監殷

夏以從周大報年豐肇稱郊祀社稷宗廟罔不肅祇山川羣神于茲望秩馨香薦其明德禮樂備於太平惟其學有于緝熙是以化成乎經緯至於燾載之內聲教所加共惟帝臣莫非王土南訛朔易時靡有爭西暨東漸罔不率俾亦由有常德以立武事耀神武以折遐衝雷霆如雷于疆于理黨項之陪臺稱亂詔始問而伏誅柔然之種落不庭兵一征而獲醜事無遺策師不踰時四海永清諸福畢至故臣民咸尚其慶謂德業有光於前

由是稽首颺言竭誠歸美神功不宰蓋亦強為之名聖
度能謙僅得勉俞其請臣以為懋敬厥德之謂欽化成
天下之謂文無思不服之謂廣功成止戈之謂武臣等
不勝至願謹奉上玉冊玉寶加上尊號曰應天興祚欽
文廣武仁德聖孝皇帝勅旨儀仗用二千人車輅不須
陳設奉冊以太尉李石奉寶司徒讀寶侍中進冊狀中
書侍郎讀冊中書令進寶狀門下侍郎以宰執攝舉冊
中書舍人舉寶給事中各二捧冊捧寶官各四太常卿

二押冊吏部侍郎押寶禮部侍郎正官外以三品攝充

以左宣徽同知攝行禮侍中

十一月十一日

命學士院張景仁

撰冊文待制王彥潛書篆冊寶

十一月九日

應差行事官及

冊寶監造制度次第

并十日

奏定行禮節次並用大定七

年禮例惟以加上尊號不比初受冊不用恭謝儀尊冊

禮成

二十日

制曰朕以祖業惟艱天下至大圖惟負荷莫

敢荒寧賴九廟詒謀三靈協贊仁征義伐時靡有爭長

治久安慮無遺策諸福之物畢至萬邦之年屢豐邇者

干羽敷文郊宮肆祀禮樂明備神祇燕寧是皆多助之
致然豈獨眇躬之能爾而羣工在列徽號見加懇請既
堅再辭不獲載念俯從于衆欲亦將上合于天心肆膺
備物之儀用答樂推之望今已勉受應天興祚欽文廣
武仁德聖孝之號於戲政成則歸美故當通上下之情
有大而能謙敢自忽盈成之守布告遠近咸使聞知

大金集禮卷二

欽定四庫全書

史部

大金集禮卷四

詳校官監察御史臣劉芬

編修臣程嘉謨覆勘

覆校官中書臣汪學金

校對官中書臣王鍾泰

謄錄監生臣閻澧

欽定四庫全書

大金集禮卷三

追加諡號上

天會三年奉上太祖諡號

天會十三年奉上太宗諡號

天會十三年奉上景宣皇帝諡號

天會十四年奉上祖宗諡號

皇統五年增上太祖尊諡

皇統五年增上祖宗尊號

天會三年奉上太祖諡號

天會三年六月安班貝勒果等奉表曰功與天同者
非天不可以儼號德與地合者非地不足以齊稱昔在
三皇以同天之功而為喻降自五帝以合地之德而建
名故功德克配於乾坤則稱號久光於竹帛仰惟先大
聖皇帝撫興隆之運膺眷命之休奉天討以除殘運神
謀而制勝曾不十載底定四方代虐以寬拯遼民於焚

溺交鄰有道得宋國之服從豈非百代之閔休誠亦羣
生之幸會方期定鼎遽泣遺弓皇帝陛下以同氣之親
隆奉先之孝誕布聖武訖成伐功茲垂烈於無期實肇
基之有自敢上強名之號願新追冊之儀日月之光雖
不容於繪畫海嶽之施庶少報於涓埃詔答曰先聖登
遐眇躬繼祚念大勲之已集顧尊諡之猶稽卿處元良
性資純孝請行追冊之禮深契永思之懷所請宜允十
二月二十三日奉上冊寶冊曰孝弟嗣皇帝臣諱謹再

拜稽首上言曰蓋聞創丕基樹鉅本將慶流於萬世者
先王啓後之功揚鴻懿薦大明使輝映於百王者後世
奉先之道實始終之鉅美抑今古之通行者也伏惟兄
大聖皇帝應輝魄之元符握滎河之祕紀三靈協贊千
載勃興居多淵靜之謀動合變通之道御家以儉遵夏
禹以卑宮刑國以輕體漢高之約法加以神襟豁達聖
器英雄乘覆昏取亂之機奮濟世安民之業周文已出
知殷滅之有期唐祖既生見隋亡之不遠頃者有遼訖

運昏主承家狎侮太平荒迷多罪先絕隣好曲造兵端
既誘納我叛亡又侵圖我邊鄙天實厭棄民日怨咨戚
既自貽禍將孰免繫天下起旱霓之望我聖人行時雨
之征親御六師用申九伐人病大江之阻自得通達兵
臨巨敵之來闕占瑞火故能一舉取遼霄再舉下雲燕何
銳敢前無堅不破方當秦野肆揚逐鹿之蹤俄值軒湖
長徃飛龍之駕天命有屬微躬弗遑康寧勉思述繼百
神假手果拔怨叛之根四海驩心遂定神明之器益憑

成美獲畢前功敢忘歸報之誠嚴奉追崇之號拓地開
封之謂武體乾啓祚之謂元合以為名庶其稱德謹奉
玉冊玉寶恭上尊號曰武元皇帝廟號太祖伏願耿光
不泯與日月以俱垂休烈無窮將山河而共久格思神
馭膺此縟儀尚期顧歆永有蒙賴冊禮畢其日詔曰朕
以眇躬嗣膺丕緒伏念先皇帝生資神武卓冠古先威
震如雷霆道大若天地日月所照罔不歸仁豚魚之微
亦皆被澤念豐功厚德當盡顯揚賴元老宗工有所協

贊比覽章奏深協朕懷穀旦式涓上儀爰舉以天會三年十二月二十五日恭上尊諡曰大聖武元皇帝廟號太祖於戲肇無疆之業至聖人以難名彰莫大之功非隆謚而曷稱布告中外咸使聞知

天會十三年奉上太宗諡號

天會十三年三月將追冊太宗皇帝行禮五日宣付司空昱攝太尉左丞相宗翰攝中書令進冊左監軍古新攝中書奉寶郎君扎拉郎君阿固岱攝中書令奉冊西

京留守高慶裔攝門下侍郎讀寶兵部侍郎烏魯翰林學士韓昉攝中書侍郎讀冊禮賓使摩琳等二員攝給事中舉寶遙郡珠展等四員攝中書舍人舉冊攝太常卿太常博士各二攝典儀二七日奉上册寶冊曰維天會十三年歲次乙卯三月甲戌朔七日庚辰哀孫嗣皇帝臣諱謹再拜頓首言曰伏以乾坤覆載之功非俄可度而俄可測耳目見聞之外或名曰夷而名曰希乃知妙出於器形尚有強加其稱謂故帝皇以降號謚攸存生

以表其殊功沒則節其大惠率由錫命於上帝將用式
孚於後人非臣子之所得專在典章而不敢闕宜迹所
行之大用光不朽之傳伏惟大行皇帝廣淵清明篤實
純粹渾然德性而無所畛域發乎事業則休有烈光始
乎太祖之濯征常以介弟而居守推恩撫衆而內益固
本務穡節力而外無匱供好經遠猷克斷大事共能定
天下之業豈特寬關中之憂兆姓與能百靈眷德位肆
定於主器心常戢於在淵將嗣丕圖猶云菲德推戴之

始躬三讓而克誠臨御以來明兩作而善繼每念前人
之圖事欲終下武之伐功於時民望尚殊邦統未一遼
主之竄越也叔合餘燼宋人之背誕也包藏禍心爰命
進師密授成筭奉天致討惟日奏功故纂服之後不數
年其係組而來凡三帝萬里共貫六合一家曾無專享
之私遂定久安之勢畫封守以正域選賢能而為邦物
肅德威人服義舉處衽席無為之逸鳩方冊不載之功
必也聖乎其可知已若乃茂昭孝德夤奉先猷殆將一

動而順稽非止三年而不改議有俯迫政或當更泣祖
訓於手澤之餘下莫仰視畏神威於屋隅之近躬若無
容繼述之間慎重如此其知人則哲乃任官惟賢慎簡
親勲共位將相有大用之材使各盡於不賞之功無所
疑實駕馭以知方故優游而成治至於敬宗立愛齒族
居尊內外敦序而無間言飲食洽比而有餘惠禮貴情
稱實嫌名浮不疑而物亦誠好靜而民自正無玉食自
奉禹儉不過以茅茨是居唐風載郁好善言惡旨酒遠

佞人放鄭聲道交萬物而用必以時法約三章而刑不留獄燕殿達窮民之告上都禁末利之游疾苦周知澆競是息謂七德戢兵也切戒黷武謂八政先食也每親督農第知安民之難未嘗以位為樂謙抑不德而德逾有淵嘿不言而言乃謹故協氣橫流大田屢稔瑞靡不至史無絕書殆莫得以殫論可概言其所覩金僊效像有素鵲之為先國犬觸邪豈神羊之待族乃德之致非人所能執貺丕昭幽明胥悅巍乎蕩乎能事之斯畢猗

歟那歟聖功之無加天下大安王位孔固是宜平格以
得壽遽告彌留而弗興爰屬眇躬嗣膺大寶舍予不立
莫窮為度之弘於祖丕承方懼貽謀之忝玆疚茹歎充
窮靡遑會同軌以來偕俟遣車之即遠而有宗工元老
儒學禮官討論墳典之中斷自義軒而下揚摧大美發
揮英聲道惟最高極萬物以無稱名將終易煥七世之
可觀或髣髴其形容共擬議其崖略與定款郊之請以
張對天之休謹遣攝太尉皇叔祖大司空昱奉玉冊玉

寶上尊諡曰文烈皇帝廟號太宗伏惟昭格至靈俯歆
徽號永錫介祉以綏後昆嗚呼哀哉臣諱謹言

天會十三年奉上景宣皇帝諡號

天會十三年九月將追冊景宣皇帝惠昭皇后行禮一
日命尚書令宗磐攝侍中進寶錄尚書事宗幹攝中書
令進冊左丞相宗翰攝太尉郎君烏達布二員攝侍中
奉寶左監軍古新郎君勗攝中書令奉冊西京留守高
慶裔乾文閣直學士蔡靖攝門下侍郎讀寶禮部尚書

韓昉樞密副承旨趙輪攝中書侍郎讀冊金吾蕭慶等
四員攝給事中舉寶乾文閣待制吳激等四員攝中書
舍人舉冊攝太常卿太常博士典儀各一員二日奉上
冊寶冊曰德高聖人而無其位裕在後昆子有天下則
歸所尊古隆此禮故周武追王於文考漢宣正號於悼
皇皆所以奉亡如存飾終昭遠昊天欲報誠難究於生
成大道無名或強加其稱謂方改園陵之卜宜新簡冊
之輝伏惟皇考性稟乾剛望崇震嫡廓有大度鬱為英

風安民之志出自妙齡幹國之功流於今日肇邦有夏
雖由湯后之勃興舉事亡隋實賴秦王之早計初自義
旗旣建戎輅徂征提銳旅以皆幸哲羣豪而先倡謀猷
克壯騎射兼能決幾事則不疑見大敵而愈奮長於將
將萬夫之政不足觀意在賢賢一介之善未嘗失人推
幹蠱士勇同仇濯濯威聲遂成德畏桓桓忠節率自孝
移遂協濟於天功俄永清於海內辰極旣正七鬯宜歸
文帝至公輒拒有司之請與夷讓善終推仲父之賢視

天下以若遺曾曾中之不介歷古無幾非聖而何若乃
朝夕問安左右致養勤而不懈樂且有餘宗族皆以孝
稱昆弟未嘗言間其直也正人之曲其質也安俗之淳
儼若神明莫之敢犯坦無城府亦以易從富貴不驕聲
色不溺與人同羽旄之樂處躬無彫峻之華賢愚莫遁於
聰明善惡必期於進退虛徐戒智者之察隱卹知小人
之艱蓋惟道以是從誠不聞而亦式天資至德備衆美
而無得稱地本元良在羣情之實所係何祲象之告變

遽靈儀之上賓九族為之痛心百姓嗟乎無祿自惟冲
幼夙遭閔凶頃以眇身猥承大統雖太宗大義之及此
實昭考餘休之至然十二載之於今無從所怙萬一分
之有答豈可弗為用罄厥圖莫知攸稱稽合前世詢逮
羣工咸謂論以孝思大者莫如嚴父求之禮意卑則不
可臨尊儻徽稱以未加實大典之有闕是用自上帝以
請命令元龜而卜辰將垂萬世之休奉聯二聖之號謹
遣攝太尉皇伯尚書左丞相都元帥宗翰奉玉冊寶上

尊號曰景宣皇帝廟號徽宗三日以追尊皇考妣禮成
百僚奉表賀曰聖子神孫膺期適駿烈考文母正名垂
鴻為帝者之大榮宜臣哉之胥慶伏惟睿蘊生知愛敬
終慕駒馳過隙嗟日月之不我留龍飛在天視富貴之
無以樂欲報之德不忘於心故能尊其所尊可謂孝乎
惟孝援遵舊典仰奉徽稱亦既追王宜載隆於異數本
為繼祖非謂顧其私親葬循周武以肆遷事比漢宣而
更異駿奔清廟贊大禮以告成鷺集冊庭對寵休而歸

美

天會十四年奉上祖宗謚號

天會十四年八月丙申朔詔曰蓋聞積厚者流遠德隆則報豐乃古今之達道也仰惟祖先奕世修德皇基帝迹濬發其祥而謚號未崇誠為闕典者太祖太宗方經啓恢廓故不暇給夫禮時為大惟予紹膺多福天地底平大禮尚稽惕然增懼追王固聖人之制然歷代以降世數不同亦有昆弟相及著立大功者皆極其號其與百

官羣採故實以今況古務求厥衷更當迹行累功用節
大惠朕將請於帝以永無窮之傳十五日文武百寮太
師宗磐等上議曰伏以國家肇造區夏四征弗庭太祖
武元皇帝受命撥亂光啓大業太宗文烈皇帝繼志卒
代奮張皇猷原其積德累功所由來者遠矣皇帝陛下
聖敬昭孝光於前人深惟草創之初日不暇給追崇大
典理若有待爰詔公卿暨百執事講求所以報本尊統
貴始尚親者事體至重誠非疑聞虛說所得輕議臣等

竊考書傳所載有天下者皆立七廟三昭嚮明三穆北
向太祖東向有虞夏后皆祖顓頊殷之立王周之后稷
禘所自出推以配天功大者建萬世而不祧親盡者至
四廟而迭毀歌舞發揚薦裸升降皆有常數著為定規
至於加上帝皇之稱是正祖宗之序漢魏以來隋唐而
上侈或不度務廣厥先陋則失中至貴其近何以存至
公之義貽百代之規且禮多為貴固前籍之美談而德
厚流光實本朝之先務伏惟皇九代祖廓君人之量挺御

世之姿虞舜生馮遷於負夏太王避狄邑此岐山聖姥
來歸天原肇發皇八代祖皇七代祖承家襲慶裕後垂
芳不求赫赫之名終大振振之族皇六代祖徙居得吉
播種是勤去暴露獲棟宇之安釋負載興車輿之利皇
五代祖貝勒雄姿邁世美略濟時成百里日辟之功戎
車旣飭著五教在寬之訓人紀肇修皇高祖太師質自
天成德為民望兼精騎射往無不摧始置官師歸者益
衆皇曾祖太師威稜震俗機警絕人雅善運籌未嘗被

甲臨敵愈奮應卒若神皇曾叔祖太師道宣知言智窮
博識始構經營之力卒成奄宅之勲皇曾叔祖太師機
獨運心公無私物四方聳動諸部歸懷德威兩隆風俗
大定皇伯祖太師友于盡愛國爾惟忠謀必罔愆舉無
不濟累代祖妣婦道警戒王業艱難俱殫內助之勞實
著始基之漸是宜乘羣臣之僉議酌故事以遵行欵帝
于郊稱天以誄謹按謚法布義行剛曰景主義行德曰
元保民耆父曰明溫柔聖善曰懿請上皇九代祖尊謚

曰景元皇帝廟號始祖妣曰明懿皇后中稱純備曰德
道德純一曰思請上皇八代祖尊謚曰德皇帝妣曰思
皇后好和不爭曰安好廉自克曰節請上皇七代祖尊
謚曰安皇帝妣曰節皇后安民治古曰定明德有勞曰
昭尊賢讓善曰恭柔德好衆曰靖請上皇六代祖尊謚
曰定昭皇帝廟號獻祖妣曰恭靖皇后愛民立政曰成
羣土有德曰襄強毅執正曰威慈仁和民曰順請上皇
五代祖尊謚曰成襄皇帝廟號昭祖妣曰威順皇

后愛民好與曰惠辟土蕙國曰桓明德有勞曰昭執心
決斷曰肅請上皇高祖太師尊謚曰惠桓皇帝廟號景
祖妣曰昭肅皇后大而化之曰聖剛德克就曰肅思慮
深遠曰翼一德不懈曰簡請上皇曾祖太師尊謚曰聖
肅皇帝廟號世祖妣曰翼簡皇后申情見貌曰穆博聞
多能曰憲柔德好衆曰靜聖善周聞曰宣請上皇曾叔
祖太師尊謚曰穆憲皇帝廟號肅宗妣曰靜宣皇后慈
愛忘勞曰孝執事有制曰平清白守節曰貞愛民好與

曰惠請上皇曾叔祖太師尊諡曰孝平皇帝廟號穆宗
妣曰貞惠皇后愛民長悌曰恭一德不懈曰簡夙夜共
事曰敬小心畏忌曰僖請上皇伯祖太師尊諡曰恭簡
皇帝廟號康宗妣曰敬僖皇后仍請以始祖景元皇帝
景祖惠桓皇帝世祖聖肅皇帝太祖武元皇帝太宗文
烈皇帝為永永不祧之廟須廟室告成涓日備物奉上
寶冊藏於天府施之罔極二十一日奉上

熙宗實錄云施之罔極丙辰奉上九代祖妣尊諡號

是日百僚上表稱賀

九代祖妣尊謚廟號是日百僚上表稱賀

皇統五年增上太祖尊謚

皇統五年六月三日詔曰自古繼體守文之君必以遵制揚功為本乃弘宣於令問用茂對於先靈恭惟太祖武元皇帝玄德昭升帝心簡在櫛風沐雨躬創業之艱難杖鉞秉旄拯生民於塗炭集成大統垂裕後人致今日之太平自睿謀之先定方廟祏以明崇建庶可寧神而

謚號之所推尊尚多遺美音容如在夙夜靡遑益禮有
貴於沿情事亦存於師古爰資率籲恭議答揚宜令尚
書省集百官五品以上與禮官共議增上謚號仍詳具
典禮以聞禮官議自古辨祀以南北郊太社太稷太廟
為序若太廟神主便行製造了畢即合題尊謚擇日奉
安恐在郊社之前於禮未倫候築郊兆了畢擇日奏告
昊天上帝皇地祇次奉安社稷神主及奏告其次恭造
太廟神主題號奉安入室以此為序元奉勅旨候到上

京行禮不見元奏目內有無指定候修建太廟奉安神主以後行禮或只慶元宮奉上謚號若候奉安太廟神主禮畢方奉上謚號冊寶即百官並合法服兼以皇帝所御殿合立黃麾仗及殿中省細仗太廟殿前亦合黃麾仗其冊寶在路亦合量設儀仗若太廟未奉安只於慶元宮上冊寶即行事及立班官並用常服及依例量用大小旗甲騎門仗官供奉官引從冊寶綵服若奉安後發冊即御服通天冠絳紗袍若就只慶元宮即幞頭

紅袍并慶元宮上冊寶即將來題太廟本室神便可用
新謚若於太廟先奉安神主即先題舊謚及至就本室
上冊寶又須改題新謚有兩節不同五月九日擬奏告
於太廟上冊寶切慮法物樂舞難迭只於慶元宮上冊
寶從之六月十九日命禮部尚書翰林承旨宇文虛中
撰冊文二十二日差應奉王競等二員監看成造冊寶
吏外高鳳庭等二員監看成造盥匣床并泐寶法物
寶用真玉約加上字數用方四寸以上五寸以下冊

用玉石依宋會要上尊號制度與天德貞元制度同
不該簡數

九月二十五日命太傅左丞相宗弼充大禮使會寧牧
費摩達攝侍中奉寶平章勗攝侍中讀寶平章奕攝中
書令奉冊左丞宗憲攝中書令讀冊以右丞蕭仲恭參
政李德固攝引寶門下侍郎同判失盧果吏部尚書充
攝引冊中書侍郎以吏部戶刑工部尚書充舉冊寶官
十月三日奏准奉上尊謚冊寶儀前期有司供張辰居

殿神御床案少府監鈎盾署設燎薪于殿庭西南掘坎
於其側儀鑾司設小次于辰居殿下東廂又設冊寶幄
殿于景輝門外東仗舍殿前司宣徽院量差甲騎大小
旗鼓門仗官香輿自製造冊寶所迎奉冊寶奉安于幄
殿行事官製造官皆騎馬引從門下中書侍郎在前侍
中中書令在後大禮使又在其後舉捍奉冊寶官製造
官分左右夾侍以北為上皆給人從錦帽衫帶是日未
明翰林使太官令丞鋪設香案酒果供具牲醴膳羞於

神御儀鑾司設皇帝拜褥四一在阼階上面西一在香案南面北一在殿上東欄子內西面一在燎薪之東面西設黃道自小次至阼階褥位質明有司備常行儀仗駕頭扇箴常朝官常服騎馬執鞭前導以北為上

仍給人從

錦帽衫帶

造冊寶官排辦官勾官常服於慶元宮門外立班

迎駕再拜皇帝自宮中服靴袍御馬至景暉門外下馬步入小次少頃御史臺催班大禮使行事官自幄殿奉冊寶入正門置于辰居殿西階下大禮使歸押班位閣

門使奏班齊太常卿奏請皇帝行奉上冊寶之禮

凡奏請皆俛伏興跪奏畢就一拜起

宣徽使太常卿分引前導皇帝由黃道升阼階上面西
褥位立贊請再拜閣門使臚傳在位官皆再拜乃引皇
帝由殿上正門入殿於香案前褥位再拜上香又再拜
退稍東於欄子內面西褥位立定儀鑾司徹香案前拜
褥設冊寶褥位於香案南舉冊掎冊官取冊匣子床對
捧由西階升中書侍郎分左右前導奉冊中書令讀冊

中書令並後從候於褥位置定奉冊中書令於褥位南
再拜退就殿階上西南柱外面東立讀冊官中書令稍
前再拜擗冊官取匣蓋下寘于西階下冊床舉冊官對
舉冊讀冊官中書令一拜起跪搢笏讀讀畢就一拜起
又再拜退位於奉冊中書令之次奉冊官進與中書侍
郎率舉冊擗冊官奉冊匣由西階下引從如上儀復置
於冊床置定舉寶官以寶盥進至侍中讀畢由西階下
復置于床皆如冊匣之儀有司撤冊寶褥位復設香案

南拜褥宣徽使太常卿導皇帝進就褥位再拜上香上
茶上酒樂作三酌酒樂止太祝讀祝文訖皇帝再拜復
歸阼階褥位立定大禮使升殿於香案南宣徽使處授
福酒臺盞行至皇帝阼階褥位前宣徽使贊皇帝再拜
飲福閣門臚傳賜酢再拜應在位官皆再拜大禮使跪
以酒盞進授皇帝樂作飲訖又再拜大禮使受酒盞復
以授宣徽使訖由西階下歸押班位太祝奉祝版翰林
使酌酒太官令丞量取牲羞自西階下置於燎薪之上

文武班皆回班向燎所立禮官贊請皇帝就望燎位宣
徽使取酒盞臺于翰林使以進授皇帝皇帝酌酒於燎
薪之上執事者舉燎半燎瘞于坎宣徽使贊皇帝再拜
閣門喝百官皆再拜太常卿宣徽使前導皇帝歸小次
即御座降簾太常卿俛伏興跪奏太常卿臣名言禮畢
百官皆卷班西出大禮使以下奉冊寶床納於慶元宮
奴掌去處皇帝進膳於別殿侍食官取旨有司轉仗由
來路皇帝便服還內

部擬御服如來儀省改奏便服

教坊作樂前導次日大禮使率百官稱賀太常宗弼以
下言伏覩詔書云云臣等聞帝王之興法天與道惟天
廣大孰可測度取其色則謂之蒼天取其氣則謂之昊
天惟道玄妙孰可擬議以其陰陽不測名之曰神以其
生生不窮則名之曰易帝德王功巍巍蕩蕩其于難名
亦猶是也然國家典禮有不可已古之人曰君子論譔
其先祖之美而明著之後世故顯揚先祖所以崇孝也

惟聖人之德無以加于孝是以繼緒之君夙宵惕厲念
貽燕之聖謀揚配天之大烈必有典冊以表謚號稱情
為禮以時增加其來尚矣然歷代之論互為異同或以
從簡為師古或以增多為盡美惟禮經所載聖人格言
有其舉之莫敢或廢況前代謚號既例有增多矯而從
簡是為廢禮又自漢唐以來宮室車服之制朝會燕饗
之度好賜賞賚之數禮儀文物之飾有增於古者多矣
何獨於宗廟謚號而必欲從簡哉尊號皇帝陛下紹隆

祖服不忘聿修遵崇孝之至論采前王之令典乃詔百僚俾之詳議益欲推尊應天廣運之不圖揚厲闢國開基之大業臣等奉詔踧踖懼無以仰稱聖孝敢以所聞稱述萬一恭惟太祖武元皇帝聖德格天神功益古遵晦待時弔民伐罪定萬全之策慷慨以誓師乘百勝之威談笑而定亂所攻則下所取則獲激揚義烈撫懷降附運天下於掌上攬英雄於彀中收圖書立制度慎刑罰明爵賞知人善任使而賢能為之用是以化敵境為

樂土回亂國為平世其施設大略規模宏遠與湯武比
隆過高光遠甚臣等謹集官共議稽考經史參以謚法
竊以道合於天靈承眷命謂之應乾肇啓皇圖傳序正
統謂之興運剛健文明光被四表謂之昭德拯世利民
底寧區夏謂之定功深思遠慮貫通周達謂之睿精義
妙物應變無方謂之神恭敬端肅威而不猛謂之莊踐
修世德丕承先志謂之孝貴賢親親慈民愛物謂之仁
照臨四方獨見先識謂之明充實輝光廣被弘覆謂之

大行道化民博施濟衆謂之聖肅將天威克定禍亂謂之武體仁長善尊無二上謂之元舉此大綱庶幾髣髴摹寫叙述皆出強名將以對越在天之神贊成崇孝之美稽合廷議舉無異辭請增上尊諡曰太祖應乾興運昭德定功睿神莊孝仁明大聖武元皇帝謹錄奏聞伏候勅旨十九日奉上冊寶曰孝孫嗣皇帝臣名謹拜手稽首言曰臣聞自昔繼體守文之君嗣服重熙累洽之運念稽圖之綿邈由祖考之艱勤則必茂揚耿光祗薦

大號豈惟盡臣子奉先之孝亦以答神祇申命之休故
文王肇造周室旣以文為謚而又謂之不顯考又謂之
寧王武王克定殷邦旣以武為稱而又謂之光烈考又
謂之正父載於大訓是曰王纘粵自遼人不綱上帝降
割瞻烏止於誰屋逐鹿競於中原塗炭之危玉石不辨
我太祖武元皇帝遵養時晦顧諟天明以德行仁勢靡
憑於力假奉辭伐罪攻不自於我先方秉鉞以誓師洎
臨津而飲馬神光赫然四燭輝甚朝暾天塹為之伏流

坦如平地故民褫魄鄰壤歸心牧野前徒俄倒戈而自
潰霍邑固守望舉鞭而已推自是歲冒風霜躬擐甲胄
其至有如時雨其攻無復堅城未踰數載之間盡取五
京之地北連六鎮南界九河西懾崆峒東漸溟渤若遠
若近悉主悉臣至於圖任親賢倚如手足懷服歸附推
以腹心有典有則以垂裕於子孫無黨無偏以示公於
好惡惡衣服卑宮室夏禹之無間然也不邇聲色不殖
貨利成湯之又日新也治監太清簡易為政義吳之惇

風也德宗克讓推授靡私唐虞之高躅也若乃仁恩光被於有截智慮預圖於未形禮義所維威信所接卜世之久與天無窮臣嗣守丕圖恪繩遺矩念欲報之懷曷已而追崇之禮未加想如在之音容懍弗寧於朝夕率籲衆志參稽格言咸謂道合於天至謂之元

與謚
議同

雖地

溥天崇固不容於測度而涓流塵集莫少益於高深臣不勝大願謹奉玉冊玉寶恭上尊諡曰應乾興運昭德定功睿神莊孝仁明大聖武元皇帝恭惟神用無方天

監在下察沖人之永慕歆兆姓之樂推風馬雲車俯故宮而慙憇金文玉篆揚景鑠於無窮

皇統五年十一月七日增上祖宗尊諡

皇統五年閏十一月七日詔曰朕聞創業垂統祖先所以貽燕謀遵制揚功後嗣所以恢弘烈稽孔聖達孝之說見武王追尊之文著在禮經遂為永法我國家千齡應運累聖重光造攻始於有遼基命集於皇祖比涓吉日祇薦隆名天日澄輝神民慶悅載念丕圖之永邈率由奕葉之相

承始於憂勤浸以光大在眇躬持守之意敢專享於盈成
推武元尊親之心想不忘於敬愛昭茲令聞屬在此時宜
令尚書省於都堂集文武執事官五品以上與禮官稽考
前代故事議增上祖宗尊謚議定擇日奏告施行十五日
太傅宗弼以下伏惟御札云云臣等承命忻懌敢不奉行
恭惟尊號皇帝陛下聖孝因心夙夜惟念既已躬上慶元
宮冊寶又推原太祖皇帝聖意增崇列聖尊謚以發明重
光之緒合於孔子所稱武王善繼人之志善述人之事為

孝之達敬具前代故事有宋之制備經諸儒講議最為
詳悉其於廟謚未有天下者追謚至四字有天下者增
至十四字載在史冊足為明據恭以列聖創業垂統以
艱難勤儉保國子民積累百年迄成大業蓋與殷周之
興無異其惇朴純質崇尚易簡則與羲軒同風戡定
禍亂伐罪弔民無敵於天下則與湯武比德至於聖聖
傳授誠實相付不以尊位為己私雖唐虞不能過既而
天命不貳人神與能大寶終歸於正統此又比之唐虞

尤為盡善是宜對揚宏休勒之琬琰以垂鴻猷於億世
臣等謹按謚法參以經典格言於已定謚號之上增加
字數悉如故事始祖景元皇帝避地他邦聿來上國始
以聖意斷訟邦人尊服至今為法宜增上謚曰懿憲景
元皇帝取浸以光大曰懿創制垂法曰憲之意德皇帝
生而神異隱德不曜宜增上謚曰淵穆玄德皇帝取
澄潛用晦曰淵布德執義曰穆應真生神曰玄之意安
皇帝龍潛修德恭默無為以厚子孫之福宜增上謚曰

和靜慶安皇帝取不剛不柔曰和寬樂恭仁曰靖積善
有餘曰慶之意獻祖定昭皇帝始立室家漸成都邑鳩
民化俗悉本純儉宜增上謚曰純烈定昭皇帝取見素
抱朴曰純安民有功曰烈之意昭祖成襄皇帝率義為
勇耀武拓境好施不吝宜增上謚曰武惠成襄皇帝取
闢土拓境曰武愛民好與曰惠之意景祖惠桓皇帝聖
智英特肇基帝業土宇日廣宜增上謚曰英烈惠桓皇
帝取出類拔萃曰英聖功光大曰烈之意世祖聖肅皇

帝獨運神策盡平叛亂威無不加德無不懷實始剪遼
以興寶祚宜增上謚曰神武聖肅皇帝取聖而不可知
曰神克定禍亂曰武之意肅宗穆憲皇帝思慮通達好
謀能斷宜增上謚曰明睿穆憲皇帝取獨見先識曰明
思能作聖曰睿之意穆宗孝平皇帝法令歸一恢大洪
業盡服四十七部之衆宜增上謚曰章順孝平皇帝取
法度大明曰章慈和徧服曰順之意康宗恭簡皇帝聿
修至德克勝隣敵宜增上謚曰獻敏恭簡皇帝取聰明

睿智曰獻應事有功曰敏之意太宗文烈皇帝持志淵
冲恭承太祖付托之命乃位宸極內治外攘一遵先志
功隆德普躋民仁壽翼善傳聖歸于大公宜增上謚曰
體元應運世德昭功哲惠仁聖文烈皇帝法天行道曰
體元厯數在躬曰應運同文王之聿修曰世德同武王
之繼文曰昭功知人曰哲安民曰惠為天下得人謂之
仁博施濟衆謂之聖徽宗景宣皇帝在太祖光有天下
之時位居元嫡推遜大寶黃屋非心誕育聖明儲祐無

極宜增上謚曰允恭克讓孝德立功佑聖景宣皇帝誠敬不懈曰允恭推位不居曰克讓奉事太祖先意承志曰孝德密贊謀謨道濟天下而人無能名曰立功誕生聖嗣傳序正統曰佑聖已上廟號如故如當聖意乞降旨有司備禮差官奏告應合行事件候奏告禮畢檢舉施行勅旨恭依十七日奏准十二月八日九日十日行奉告禮十二月一日命宗本左丞相宗憲右丞相蕭仲恭充奏告獻官於慶元宮奏告始祖康宗明德宮奏告太

宗慶元宮奏告徽宗其日未明於殿上排辦每位食牒

十四實以茶食蔬菜菓牒十四實以菓食以梁米粳飯

又椀二實以大羹

肉汁也

盤二其一實以羊牲體二其一

實以猪牲體二

並一熟

匙筯各一副茶盞各一承以托

子酒盞各三共承以一盤酌酒器各一酌茶器各一花

餅設於食案之前并菓壘量案長短間設共設香案一

上置香爐香合在殿之中楹間酒二十銀瓶

第二日酒五瓶第三日五瓶

在神位之東酒注四在酒瓶之側祝板案在神位之西
獻官拜褥其一設於香案之南餘皆設於神之前少府
監掘坎於庭中之西南鈎盾署設燎薪於坎之中排辦
官告備閤門引百官班入立庭中北向次引獻官升殿
上香再拜

應獻官拜立班官皆再拜

次引獻官至神位前褥位一拜跪持茶酒者以次進至
獻官之右持酌茶酒器者進至獻官之左獻官酌茶酒

就一拜起少退立捧祝板官以祝版進至神位西南斜
向讀祝官一拜跪讀祝畢就一拜起祝版復歸於案獻
官再拜祝官退

第一日以次詣諸位前皆如上儀

獻畢復歸庭中班執事者奉祝版及量取牲羞下置於
燎薪之上百官回班望燎持酒盞者以酒授獻官酌於
燎薪之上獻官百官皆再拜半燎班出守燎者瘞之

第一日酌酒十盞第二日第三日各一盞第一日羊

五猪五第三日各羊一猪一並於前一日宰殺

十七日增上祖宗尊諡肆赦制曰朕聞大一統以居尊
必推功於祖考交三靈而佑聖爰均慶於臣民國家勅命
惟時重光莫麗純德符於軒昊大功軼於禹湯肆朕纂
承敢忘駿惠而廟謚所紀德美未詳懍夙夜之靡寧集
臣鄰而博議謂祖有功而宗有德雖已祇率於舊章若
敬所尊而愛所親尚克繼成於先志肆涓良日肇舉上
儀神靈居歆中外胥悅宜廣配天之澤永昭凝命之休

可大赦天下內外大小職官並與覃恩嗚呼嗣恭德於
前人其無遏佚得歡心於四表庶格燕寧更賴三事宗
工百司庶正益懋贊襄之意弼成繼述之功

大金集禮卷三